

## तीतसयात पावलं च्वःगु पौ म्हसीका

तीतस यहदीमखुम्ह ल्याय्म्हम्ह विश्वासी खः। लिपा व पावलयात वयागु ज्याय् ग्वाहालि याइम्ह जुल। पावलं वयात क्रेटय् च्वंगु मण्डलीयागु ज्या स्वयेत अन त्वःताथकूगु खः। पावलं थ्व पौलय् स्वता मू खँ न्ह्यथनातःगु दु।

न्हापां ला, तीतसयात मण्डलीया थकालिपिनिगु चालचलन गथे जुइमाः धकाः ध्वाथुइकातःगु दु। अनंलि मण्डलीया थीथी मनूत गथे बुराबुरी, ल्याय्म्ह, ल्यासे व दासतयत् गुकथं स्यनेकने यायेमाः धकाः धयातःगु दु। दक्वसिबय् लिपा पावलं तीतसयात विश्वासीतयगु चालचलनया बारे ध्वाथुइकातःगु दु, गथे थःथवय् मिलय् जुयाः दया माया यानाच्चनेगु, हेबाय्चबाय् मयायेगु, जवाःसवाः याना मजुइगु, व मण्डलीइ पुचः पुचः बायाः मजुइगु।

धलः पौ

न्ह्यखँ १:१-४

मण्डलीया थकालि १:५-१६

मण्डलीया थीथी विश्वासीतयगु ज्या २:१-१५

अती व ख्याच्चः ३:१-११

क्वचाय्कूगु ३:१२-१५

## तीतस

पावलपाखें ज्वजलपा

1 परमेश्वरया दास, येशू ख्रीष्टयाम्ह प्रेरित जि पावलं च्वयाच्चनागु दु। जिगु ज्या हे परमेश्वरं ल्यया तःपिनिगु विश्वास क्वातुका बीगु व सत्य खँयात थुइका बियाः परमेश्वरयात यःथें याये सयका बीगु खः।

2 गुबलें मखुगु खँ ल्हाना मदीम्ह परमेश्वरं न्हापांनिसें हे झीत अनन्त जीवन बियादी धकाः धयादीगु खः।

3 झीत मुक्ति बियादीम्ह परमेश्वरं हे जितः न्यके बियाः पाय्छि इलय् फुक्कसितं वय्कःयागु भिंगु खँ सीके बियादिल।

4 तीतस, झीगु विश्वासं याना: छन्त जिं थ: हे काय् थें यानातयागु दु। झी परमेश्वर बा: व झीत मुक्ति बियादीम्ह ख्रीष्ट येशू छन्त दया माया व शान्ति बियादीमा।☆

5 आम्कन ल्यंदनिगु ज्या पूवकेत व शहर पतिकं मण्डलीइ थकालिपि ल्ययेत जिं छन्त क्रेटय् हे त्व:ता थकागु ख:।

6 थकालि जुइम्ह मनू दोष मदुम्ह, छम्ह हे जक मिसालिसे ब्याहा या:म्ह जुइमा:, हानं वया मस्त नं विश्वासीत व य:य:थें सना मजुइपिं जुइमा:।

7 थकालि परमेश्वरया ज्या याइम्ह मनू ख:। उकिं थकालि छुं हे दोष मदुम्ह जुइमा:। अले हानं थ: य:थें यानाजुइम्ह, याकनं तंम्बइम्ह, अय्ला: थ्वँ त्वना जुइम्ह, ल्वाना जुइम्ह, लोभीम्ह नं जुइ मज्यु।

8 पाहांयात दुगालनिसें दुकाइम्ह, भिंगु खँ यय्किम्ह, मन तया: ज्या याइम्ह, ख्वा: स्वया: ज्या मयाइम्ह, पवित्रम्ह, थ:त क:घाये फुम्ह जुइमा:।

9 अले थ:म्हं स्यनाकयात:गु भिंगु खँयात क्वातुक ज्वनातइम्ह व जिमिसं स्यना थें मेपिन्त नं भिंगु स्यनेकने याना: साहस बीम्ह जुइमा:। अले हानं थ्व भिंगु खँयात मभिका: जुइपिन्त नं इमिगु द्वंबिद्वं क्यनाबी फुम्ह जुइमा:।☆

मखुगु खँ स्यनिपिन्त ख्याच्च:

10 छायाधा:सा अप्व: धया थें मनूत धयागु खँ मन्यनीपिं, म्वा:मदुगु खँ ल्हानाजुइपिं, मखुगु खँ ल्हानाजुइपिं दु। थज्या:पिं अप्व: याना: ला यहदी विश्वासीत हे ख:।

11 थुमिगु म्हुतुप्वा: तिनाबीमा:। धिबायागु नितिं थुमिसं स्यने मज्युगु खँ स्यना: छें स्यंकाच्चंगु दु।

12 इमि हे छम्ह अगमवक्तां थथे धयाथकूगु दु – “क्रेटय् च्वंपिं मनूत फुक्कं मखुगु खँ ल्हाइपिं, ग्यानापुपिं पशुत व ज्या मयासें न जक नइपिं ख:।”

13 थ्व खँ धात्थें ख:। अय्जुगुलि इमित तसकं ब्व:ब्यु, अले जक इपि विश्वासय् बल्लाना च्वनी।

14 अले इमिसं यहदीतय्गु पुलां पुलांगु बाखं व सत्ययागु लं लिचिकीगु खँय् न्हायपं तकं बी मखु।

15 शुद्धपिन्त ला फुक्कं शुद्ध हे जुइ। मभंपिन्त व विश्वास मयाइपिन्त धा:सा छुं नं शुद्ध जुइ मखु, छायाधा:सा इमिगु मन व बिचा: हे शुद्ध मजु।

☆ 1:4 १:४ २ कोर ८:२३; गला २:३; २ तिमो ४:१० ☆ 1:9 १:६-९ १ तिमो ३:२-७

16 इमिसं परमेश्वरयात म्हस्यू धकाः धयाजुइ, इमिगु ज्यां धाःसा इमिसं परमेश्वरयात म्हमस्यू धकाः क्यनी। इपि घच्चायापुपि, धयागु खँ मन्यनीपि व छुं नं भिगु ज्या यायेत मल्वःपि खः।

## 2

ख्रीष्टियन जीवन गुकथं हनेगु

- 1 न्हागु जूसां छं भिगु खँ नाप ज्वःलाःगु जक स्यनेगु याना च्वँ।
- 2 बुरातयसं थातं च्वनेगु, हनेबहः जुइक सना जुइगु, थःत कःघाना च्वनेगु, विश्वास यानाच्वनेगु, माया यायेगु व न्हागु खँयं नं सह यानाच्वनेगु यायेमाः धकाः स्यनेकने या।
- 3 अथे हे बुरीतयत नं परमेश्वरयात मानय् याना च्वँ, मेपिन्त मभिंकाः खँ ल्हाना जुइ मते, अय्लाः थ्वँ त्वनाजुइ मते, बरु दुग्यंगु खँ स्यनेकने या धकाः स्यना ब्यु।
- 4 अथे जूसा इमिसं ल्यासेपिं मिसातयत् थः मस्तयत् व भाःतयात माया यायेगु खँ स्यने फइ।
- 5 अले इमिसं इमित थःत कःघाना च्वनेगु, पवित्र जुयाच्वनेगु, छँ बांलाक कःघाना च्वनेगु, दया यायेगु व भाःतं धाःथें च्वनेगु खँ स्यनेकने याइ। थथे जूसा सुनानं परमेश्वरयागु वचनयात क्वहंकाः खँ ल्हाये फइ मखु।
- 6 अथे हे ल्याय्म्हपिं मिजंतयत् नं थःत कःघाना च्वँ धकाः स्यनेकने या।
- 7 छं थःम्हं हे भिगु ज्या यानाः इमिगु न्हाःने नमूना जुयाः क्यँ। स्यनेकने यायेबलय् खःगु, दुग्यंगु व
- 8 सुनानं छुं धाये मफय्क नवा। अथे जूसा विरोधीतयसं नं छुं धाये मफयाः थः हे लज्या चाये माली।
- 9 दासतयत् नं मालिकं धाःथें यानाः इमित न्हागु खँयं नं लय्ताय्का च्वँ, अले जवाःसवाः याना जुइ मते धकाः स्यनेकने या।
- 10 अले उखेंथुखें खुयाकायेगु मयासें भिंम्ह व विश्वास याये बहःम्ह जुयाः न्हागु खँयं नं झीत मुक्ति बियादीम्ह परमेश्वरयागु वचनयात तःधंके फयेमा।

ख्रीष्टियन जीवनया जग

- 11 परमेश्वरं फुक्कसितं मुक्ति बीत दया माया यानादीगु खः। थ्व हे खँ फुक्कसितं सीके ब्यूगु दु।
- 12 थ्व हे दया मायां झीत पापं व संसारयागु ज्याखं लिचिकी, अले थःत कःघानाः धर्मी व परमेश्वरयात मानय् याइपिं जुयाः थ्व संसारय् म्वानाच्वने फइ।

13 झीत मुक्ति बियादीम्ह, झीम्ह तःधंम्ह परमेश्वर येशू ख्रीष्ट हानं झाइतिनि। झीपि थ्व हे तःधंगु आशायागु लँ स्वयाच्चने।

14 झीत झीगु पापं छुतय् यायेत वयकः थः हे सिनादिल। थुकथं वयकलं झीत थः मन् यानाः पवित्र यानादिल, अले भिंगु ज्या यायेत साहस बियादिल।\*

15 छं थ्व फुक्कं न्यंकाब्यु। ब्वःबी माःसां साहस बी माःसां छं स्वयाः या। अले छन्त सुनानं हेपय् याये फइ मखु।

### 3

न्ह्यागुं ज्या यायेत नं न्ह्यचिलिगु

1 सरकार व हाकिमतयसं धाःथें च्वनाः इमिसं धाःगु खँ न्यनेमाः धकाः विश्वासीतयत् थुइकाब्यु। भिंगु न्ह्यागु ज्याय् नं न्ह्यच्यु।

2 सुयातं मभिकाः खँ ल्हाये मते, सुंनाप ल्वाना जुइ मते, अले फुक्क नाप क्वमिल्ल जुयाः मिलय् जुयाच्वँ धकाः इमित थुइकाब्यु।

3 झीपि नं छकः ला छं मस्यूपि, अतेरिपि, लँ टुंका च्वनापि, मभिंगु मतिइ तथा जुइपि, मोजमज्जा जक याइपि, नुगः मुइका जुइपि व थःथवय् मययका जुइपि जुइ धुन।

4 अयनं झीत मुक्ति बियादीम्ह परमेश्वरं मनूतयत् दया माया क्यनादीगुलि

5 वयकलं झीत मुक्ति बियादिल। झीसं भिंगु भिंगु जक ज्या यानागुलि झीत मुक्ति बियादीगु मखु, बरु वयकलं दया यानाः झीत झीगु पाप सिलाः न्हपि यानाः व पवित्र आत्मायागु शक्ति मुक्ति बियादीगु खः।

6 येशू ख्रीष्टं यानाः परमेश्वरं झीत पवित्र आत्मां जायकादिल।

7 वयकलं दया माया यानादीगुलि झीपि परमेश्वरया न्ह्यःने धर्मी ठहरय् जुइ फत, अले झीसं आशा यानागु अनन्त जीवन नं काये दत।

8 थ्व खँ धात्थें खः। थ्व खँय् छं अप्वः मन बियाः स्यँ। थथे यात धाःसा परमेश्वरयात विश्वास याःपिन्सं भिंगु भिंगु ज्या यायेत कुतः याइ। थ्व फुक्क मनूतयत् ज्यालगय् जूगु भिंगु खँ खः।

9 म्वाःमदुगु खँय् हाः जुइ मते, तापाःबाज्यापिनिगु नां कयाः फुइँ याना जुइ मते, व्यवस्थायागु खँय् ल्वाः जुइ मते, छायाधाःसा अथे यानाः छं भिनि मखु, अले बांलाइ नं मखु।

\* 2:14 २:१४ भज १३०:८; प्रस १९:५; व्य ४:२०; ७:६; १४:२; १ पत्र २:९

10 मनूतयत् ल्वाका जुइपिन्त छकः निकः न्वाना नं मजिल धाःसा व नाप जुइ मते।

11 अज्याःम्ह मनू मभिंम्ह धकाः ला छं सि हे स्यू। वं याना जूगु ज्यां हे व पापी खः धकाः धाइ।

पावलया लिपांगु सल्लाह व ज्वजलपा

12 जिं अर्तिमासयात जूसां तुखिकसयात जूसां छन्थाय् छवयाहये। इपिं थ्यनेवं छं निकोपोलिसय् जितः नापलाः वयेगु कुतः या, छायाधाःसा जिं चिकुला ज्वःछि अन हे च्वनेगु मतिइ तयागु दु।☆

13 जेनास धाःम्ह वकील व अपोल्लोसयात छं फक्व ग्वाहालि बियाः याकनं छवयाहिं। इमित छं मगाः मज्जइमा।☆

14 झी मनूतयसं मालीबलय् माःकथं भिंगु ज्या याये सय्केमाः। ई अर्थे सितिं छवये मज्यु।

15 जि नाप दुपि फक्कसिनं छन्त ज्वजलपा धयाहःगु दु। जिमित माया याइपि आमकन च्वंपिं विश्वासीतयत् नं जिमिसं ज्वजलपा धयाहःगु दु धकाः धयाब्जु।

परमेश्वरं छिपिं फक्कसितं दया माया यानादीमा।

☆ 3:12 ३:१२ प्रे २०:४; एफि ६:२१-२२; कल ४:७-८; २ तिमो ४:१२  
१६:१२

☆ 3:13 ३:१३ प्रे १८:२४; १ कोर

**Newar**  
**Newar: Newar (Bible)**

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

---

PDF generated using Haiola and XeLaTeX on 16 May 2025 from source files  
dated 17 May 2025

838cc630-4ccf-5055-be45-10a98a141cc7